

## AUTORSKE NOVINE

mart/ožujak 2016.

### SADRŽAJ:

- **Ministarstvo pravde BiH prihvatilo novi Statut AMUS-a**
- **Postignut dogovor o zaključenju recipročnog ugovora AMUS - HDS ZAMP**
- **AMUS i udruženje ugostitelja RS-a potpisali Protokol o saradnji**
- **Novi TV Spot i radio jingle AMUS-a**

### Ministarstvo pravde BiH prihvatilo novi Statut AMUS-a

Iz Ministarstva pravde Bosne i Hercegovine je 21.03.2016. AMUS-u dostavljeno Rješenje o upisu promjena u Registar udruženja. Ovim Rješenjem Ministarstvo pravde BiH je upisalo u Registar novi Statut AMUS-a usvojen na Skupštini dana 15.02.2016. godine i verificovalo sve organe Udruženja što je rezultat velikog zalaganja u radu Predsjedništva, članova Upravnog odbora i uposlenika Stručne službe koji su uspjeli pronaći brojna rješenja i usaglasiti ponekad oprečne stavove Ministarstva pravde i Instituta obzirom da Zakon o kolektivnom ostvarivanju autorskih i srodnih prava i Zakon o udruženjima i fondacijama BiH nisu po svim pitanjima međusobno usklađeni.



U pronalaženju tih rješenja značajnu ulogu su, pored rukovodstva AMUS-a, imali upravo predstavnici ove dvije državne institucije koji su AMUS-u dali nesebičnu podršku, što je rezultat naših kvalitetnih međusobnih odnosa koje ćemo njegovati i u budućnosti.

Ovaj dokument Ministarstva pravde BiH predstavlja još jedan u nizu važnih i velikih koraka u razvoju AMUS-a i kao udruženja i kao kolektivne organizacije za zaštitu prava autora muzičkih djela.

Upisom novog Statuta u Registar stekli su se uslovi da AMUS zvanično otvori svoje podružnice u Banja Luci i Mostaru.

## Postignut dogovor o zaključenju recipročnog ugovora AMUS - HDS ZAMP

Na sastanku održanom u Zagrebu između predstavnika HDS ZAMP-a i AMUS-a, postignut je dogovor o zaključenju recipročnog ugovora kojem su ispred AMUS-a prisustvovali predsjednik Upravnog odbora AMUS-a Davor Sučić, GD Stručne službe Lejla Trnčić i direktor sektora za dokumentaciju, Damir Rahmanović.



Ovim dogovorom, autori koje zastupa AMUS će biti u mogućnosti da naplate svoja autorska prava po osnovu dijela izvedenih na području Republike Hrvatske i obrnuto.

Postignuti dogovor predstavlja veliki iskorak u saradnji AMUS-a sa sestrinskim organizacijama u regionu i time značajno doprinosi u pozicioniranju AMUS-a u međunarodnim okvirima.

U okviru aktivnosti na jačanju odnosa sa sestrinskim organizacijama u regionu, predstavnici Stručne službe AMUS-a su boravili i u Beogradu u radnoj posjeti organizaciji muzičkih autora Srbije - SOKOJ.



Tema sastanka je bila približavanje stavova o zaključenju ugovora o recipročnom zastupanju kojem su prisustvovali predsjednik Upravnog odbora SOKOJ-a g-din Petar Stokanović, direktor Stručne službe SOKOJ-a g-din Aleksandar Kovačević, šef Službe za dokumentacije i raspodele g-din Srećko Barbarić, viši stručni saradnik za međunarodnu saradnju g-đa Mirjana Tešić Perović, generalna direktorica Stručne službe AMUS-a g-đa Lejla Trnčić i direktor Sektora za dokumentaciju g-din Damir Rahmanović.

Po završetku sastanka, zajednički zaključak obje kolektivne organizacije je da su približeni stavovi u vezi sa zaključenjem recipročnog ugovora, čime se stvaraju preduslovi za naplatu autorskih muzičkih dijela autora čija prava zastupa AMUS a koriste se na teritoriji Republike Srbije i obrnuto.

## AMUS i udruženje ugostitelja RS-a potpisali Protokol o saradnji

U Banjaluci je 10.03.2016. potpisan je Protokol o saradnji između Asocijacije kompozitora-muzičkih stvaralaca - AMUS i Udruženja radnika u ugostiteljstvu i turizmu Republike Srpske. Protokol je u ime AMUS-a potpisala Lejla Trnčić, generalna direktorica Stručne službe AMUS-a, a u ime Udruženja radnika u ugostiteljstvu i turizmu Republike Srpske Željko Tatić.



Protokol o saradnji dva udruženja rezultat je niza sastanaka na temu poštivanja prava autora muzičkih djela te efikasnijeg provođenja Zakona o autorskom i srodnim pravima i Zakona o kolektivnom ostvarivanju autorskog i srodnih prava. S obzirom da je kategorija ugostitelja jedna od najznačajnijih za AMUS kao jedinu kolektivnu organizaciju za zaštitu prava muzičkih djela u Bosni i Hercegovini, ovaj protokol je izuzetno važan za sve autore čija muzička djela koriste ugostitelji na području Republike Srpske.

Konferenciji za medije koja je upriličena nakon potpisivanja Protokola su prisustvovali brojni predstavnici medija: RTV Republike Srpske, RTV BN, Alternativna TV, TV K3, Glas Srpske, Blic i drugi.

## Novi TV Spot i radio jingle AMUS-a

AMUS je kreirao novi TV Spot i radio jingle, koji će biti emitirani na programima svih radio i TV emitera.

Cilj novog TV spota i radio jingla je da upozna širu javnost s djelovanjem AMUS-a te da pozove korisnike muzičkih autorskih djela na potpisivanje ugovora.

TV Spot i jingle možete pronaći na našoj web stranici – [www.amus.ba](http://www.amus.ba)

